

REGLUR

um kosningar til háskólaráðs.

1. gr.

Skipan háskólaráðs.

Um skipan háskólaráðs gilda ákvæði 4. gr. laga um Háskóla Íslands nr. 41/1999. Rector er sjálfkjörinn til setu í háskólaráði og er forseti þess.

2. gr.

Kjörtímabil.

Kjörtímabil kjörinna fulltrúa í háskólaráði er tvö ár í senn. Kosningu fulltrúa í háskólaráð samkvæmt reglum þessum skal lokið fyrir 1. mars á því ári sem kjörtímabil sitjandi háskólaráðs rennur út og miðast upphaf kjörtímabils við 1. júlí og lok við 30. júní að tveimur árum liðnum.

3. gr.

Kjör fulltrúa deilda og námsbrauta í háskólaráð.

1. *Fjöldi fulltrúa og kjörgengi.* Fjórir fulltrúar deilda og námsbrauta úr hópi kennara í fullu starfi skulu kjörnir með eftirfarandi hætti: Einn fulltrúa skal kjósa fyrir guðfræðideild og heimspekideild sameiginlega, einn fulltrúa fyrir læknadeild, tannlæknadeild og námsbrautir í hjúrunarfræði og sjúkraþjálfun og fyrir lyfjafræði; einn fulltrúa fyrir lagadeild, viðskipta- og hagfræðideild og félagsvísindadeild og einn fulltrúa fyrir verkfræðideild og raunvísinda-deild. Kjósa skal tvo varamenn fyrir hvern fulltrúa.

Kjörgengir til setu í háskólaráði eru allir prófessorar, dósentar og lektorar í fullu starfi skipaðir eða ráðnir ótímabundinni ráðningu.

2. *Kjörskrá og kjörseðlar.* Skrifstofustjórar viðkomandi deilda og námsbrauta sjá um að gera kjörskrá, hver fyrir sína deild eða námsbraut. Heimilt er deildarforsetum og formönnum námsbrautarstjórna að skipa sameiginlega kjörstjórn hlutaðeigandi deilda og námsbrauta, sem sér um gerð kjörskrár, ákveður kjördag, annast framkvæmd kosninga, úrskurð kærumála vegna kosninga og annað er að kosningunni lýtur, svo sem nánar er kveðið á um í reglum þessum. Sé kjörstjórn ekki skipuð annast deildarforsetar og formenn námsbrautarstjórnar framkvæmd kosninga, sbr. 3. og 4. tölulið þessarar greinar.

Kjörseðlar skulu gerðir í tveimur litum. Skal annar liturinn vera fyrir þá sem eru í fullu starfi (75-100%) og fyrir fulltrúa stúdenta á deildarfundi eða námsbrautarfundi og hinn fyrir þá sem eru í hlutastarfi og fara með hálf atkvæði (37 - 74% starfshlutfall).

3. *Atkvæðisréttur og vægi atkvæða.* Kosningarétt hafa allir þeir sem atkvæðisrétt eiga á deildarfundi eða námsbrautarfundi einum mánuði fyrir kjördag. Atkvæðisrétt eiga prófessorar, dósentar, lektorar, sérfræðingar, vísinda- og fræðimenn sem skipaðir eru eða ráðnir í fullt starf við deildina og stofnanir sem undir hana heyra og fulltrúar stúdenta á deildarfundi eða námsbrautarfundi. Starfshlutfallið 75% og hærri telst fullt starf í reglum þessum. Nú gegnir maður starfi í hlutfallinu 37 - 74%, og fer hann þá með hálf atkvæði. Starfshlutfall sem er lægra en 37% veitir ekki atkvæðisrétt.

Nú er starfsmaður, sem skipaður er eða ráðinn í fullt starf, í orlofi og annar ráðinn tímabundið í hans stað og fer hann þá með atkvæðisrétt þess sem er í orlofi.

Atkvæðisrétt hafa þeir einir sem mæta á sameiginlegan kjörfund viðkomandi deilda eða námsbrauta, sbr. 4. tölulið.

4. *Kosning.* Deildarforsetar þeirra deilda og formenn þeirra námsbrauta, sem eiga sameiginlegan fulltrúa í háskólaráði, sbr. 1. tölulið þessarar greinar, skulu boða til sameiginlegs fundar allra þeirra sem atkvæðisrétt hafa í viðkomandi deildum og námsbrautum, til að kjósa fulltrúa sinn í háskólaráð og tvo varamenn. Miða skal við að kjördagur sé sem næst 15. febrúar og eigi síðar en 28. febrúar á því ári sem kjörtímabil sitjandi háskólaráðs rennur út og skal hann auglýstur tryggilega í viðkomandi deildum og námsbrautum. Kosning skal vera skrifleg. Deildarforsetar þeirra deilda og formenn þeirra námsbrauta, sem eiga sameiginlegan fulltrúa í háskólaráði, sbr. 1. tölulið þessarar greinar, eða kjörstjórn ef hún er skipuð, ákveða nánar fyrirkomulag kjörfundar. Talning atkvæða fer fram strax að atkvæðagreiðslu lokinni.

Ef enginn fær meirihluta atkvæða í fyrstu umferð skal kjósa að nýju um þá tvo sem flest atkvæði fengu. Séu tveir eða fleiri jafnir í öðru sæti ræður hlutkesti. Þegar kosið er um þá tvo sem flest atkvæði fengu telst sá rétt kjörinn sem fær meirihluta greiddra atkvæða. Séu atkvæði jöfn ræður hlutkesti.

Varamenn skal kjósa með sama hætti hvorn í sínu lagi. Fyrsta varamann skal kjósa úr hópi kennara annarrar deildar eða námsbrautar, en þeirrar sem fulltrúi í háskólaráði er kjörin úr. Hinn varamanninn skal kjósa úr hópi kennara deildar eða námsbrautar, sem hvorki fulltrúi í háskólaráði, né fyrsti varamaður, kemur úr. Þar sem tvær deildir kjósa sameiginlegan fulltrúa er heimilt að aðalmaður og annar varamaður komi úr sömu deild.

4. gr.

Kjör fulltrúa samtaka háskólakennara.

Fulltrúi samtaka háskólakennara og tveir varamenn skulu kjörnir til tveggja ára í senn úr hópi kennara eða sérfræðinga í fullu starfi á sameiginlegum almennum fundi samtaka háskólakennara sem Félag háskólakennara og Félag prófessora við Háskóla Íslands standa fyrir.

5. gr.

Kjör fulltrúa stúdenta í háskólaráð.

Tveir fulltrúar stúdenta og tveir til vara fyrir hvorn um sig, skulu kjörnir til tveggja ára í senn í sérstökum kosningum þar sem allir skrásettir stúdentar háskólans hafa kosningarétt. Stúdentaráð Háskóla Íslands annast framkvæmd kosningarinnar.

6. gr.

Skipun fulltrúa menntamálaráðherra.

Menntamálaráðherra skipar tvo fulltrúa til tveggja ára í senn, sbr. 5. tölulið 4. gr. laga um Háskóla Íslands nr. 41/1999. Miðast upphaf skipunartímabils við 1. júlí og lok við 30. júní að tveimur árum liðnum.

Ákvæði til bráðabirgða.

Starfandi háskólaráð sem kosið var vorið 1999, samkvæmt bráðabirgðareglum samþykktum af háskólaráði 8. apríl 1999, sbr. 2. mgr. bráðabirgðaákvæðis laga um Háskóla Íslands nr. 41/1999, situr til loka háskólaársins 1999-2000. Háskólaráð sem kosið er fyrsta sinni samkvæmt reglum þessum tekur til starfa 5. september árið 2000 og situr til 30. júní árið 2002. Eftir það gilda ákvæði 1. gr. um upphaf og lok kjörtímabils.

Gildistökuákvæði.

Reglur þessar öðlast þegar gildi. Um leið falla úr gildi ákvæði 7. og 8. gr. reglugerðar fyrir Háskóla Íslands nr. 98/1993, með áorðnum breytingum, sem birt var í A-deild Stjórnartíðinda.

Háskóla Íslands, 16. desember 1999.

Páll Skúlason.

Þórður Kristinsson.

16. desember 1999

Nr. 902

REGLUGERÐ

fyrir viðskipta- og hagfræðideild Háskóla Íslands.

1. gr.

Viðskipta- og hagfræðideild veitir kennslu í viðskiptafræði og hagfræði. Deildin veitir kennslu í viðskiptafræði til B.S. prófs, cand. oecon. prófs, MBA og M.S. prófs. Deildin veitir kennslu í hagfræði til B.S. prófs, B.A. prófs og M.S. prófs. Námið er vegið í einingum (e) og skal ársnám talið 30 e. Til B.S. prófs og B.A. prófs er krafist 90 e, en til cand. oecon. prófs er krafist 120 e. Til MBA og M.S. prófs er krafist 45 e hið minnsta. Deildin getur skipulagt framhaldsnám til doktorsprófs í hagfræði annars vegar og í viðskiptafræði hins vegar samkvæmt nánari reglum sem hún setur og háskólaráð samþykkir.

Deildin skiptist í viðskiptaskor og hagfræðiskor. Stjórn deildarinnar er í höndum skorarformanna, skorafunda, deildarforseta og deildarfunda. Deildarfundur hefur úrslitavald í öllum málum, sem deildin er bær að taka ákvörðun um.

Kennslugreinar deildarinnar skiptast milli viðskiptaskorar og hagfræðiskorar eftir ákvörðun deildarfundar. Hvor skor fer með málefni kennslugreina sinna í umboði deildarfundar, ákvarðar námsefni og tilhögun kennslu og prófa, ákveður skiptingu kennslu milli kennara í skor og gerir tillögur til deildarfundar um ráðningu aðjúnktar og stundakennara. Áður en deildin gerir tillögur um ráðningu í prófessorsstarf, dósentstarf eða lektorsstarf, skal leita álits viðkomandi skorar, og eiga fulltrúar stúdenta á skorafundi þá ekki atkvæðisrétt. Skorir gera tillögur til deildarfundar um nauðsynlegar fjárveitingar og nýjar stöður.

Á skorafundi eiga sæti prófessorar, dósentar og lektorar í kennslugreinum skorar og tveir fulltrúar stúdenta kjörnir ár hvert af félagssamtökum þeirra úr hópi stúdenta í sömu skor, og taka þeir sæti á skorafundum við upphaf næsta háskólaárs. Enginn getur átt sæti í tveimur skorum. Deildarfundur ákveður í hvorri skor kennari á sæti. Skor er heimilt að veita aðjúnktum sæti á skorafundum.

Hvor skor kys í apríl ár hvert formann og varaformann úr hópi prófessora, dósentar og lektora skorarinnar. Skor heldur fundi eftir þörfum. Gerðir skorafunda skulu bókfærðar.

2. gr.

Almennt um B.S. og B.A. nám.

Skipan B.S. og B.A. námsins miðast við 3 ár eða sex misseri. Í B.S. og B.A. námi er boðið upp á námsleiðir sem skorir setja nánari reglur um.

Prófgreinar til B.S. prófs í viðskiptafræði eru rekstrarhagfræði, þjóðhagfræði, reikningshald, stærðfræði, tölfræði, upplýsingatækni og aðrar greinar samkvæmt ákvörðun viðskiptaskorar, alls 90 e.